

**Yr Economi, Masnach a Materion Gwledig
Gweinidog yr Economi – Papur Tystiolaeth
6 Mawrth 2024**

Mae'r papur hwn yn darparu'r wybodaeth ddiweddaraf am rai o'r gweithgareddau yn fy mhortffolio ers ein sesiwn graffu gyffredinol ddiwethaf ym mis Rhagfyr.

Cafodd cynnwys y papur hwn ei baratoi cyn y gyllideb derfynol sydd i ddod, ac mae'n amodol ar y gyllideb honno. Dim ond newydd eu pennu mae cynlluniau gwario ar gyfer 2024-5, neu maen nhw wrthi'n cael eu pennu, a bydd cynlluniau ar gyfer y dyfodol yn amodol ar ganlyniad yr Adolygiad o Wariant.

Er bod y pwysau enbyd ar arian cyhoeddus yn dal yn heriol, rydyn ni'n parhau i ganolbwyntio ar gryfhau economi Cymru wrth adeiladu Cymru fwy teg a gwyrdd i bawb.

Rwy'n edrych ymlaen at drafod y materion canlynol gyda'r pwyllgor mis nesaf.

Model Gweithredu Targed y Ffin

Cafodd Model Gweithredu Targed y Ffin ei gyhoeddi gan Lywodraeth y DU ym mis Awst 2023, gyda chytundeb Llywodraethau Cymru a'r Alban, gan nodi mesurau diogelu ar gyfer bioddiogelwch a diogelwch bwyd. Y garreg filltir gyntaf ar gyfer rheolaethau'r ffin ar nwyddau iechydol a ffytoiechydol wedi'u mewnfario o'r UE – gan gynnwys Iwerddon – oedd 31 Ionawr 2024, ac rwy'n falch o ddweud bod y broses weithredu yn un ddiraffferth ac nad adroddwyd llawer o broblemau. Mae'r cam cyntaf yn gofyn am dystysgrif iechyd a rhag-hysbysiad, gydag adolygiad gan ganolfan ganolog sy'n darparu adborth. Dros amser, bydd y gorfodi'n cynyddu.

Ar gyfer mewnfario o wledydd ar wahân i Iwerddon, bydd gwiriadau ffisegol yn dechrau ar 30 Ebrill. Nid ydym wedi cytuno ar ddyddiad ar gyfer dechrau cynnal gwiriadau ffisegol ar fewnfario o Iwerddon eto. Rwyf wedi addo y byddwn yn rhoi rhybudd rhesymol i fusnesau er mwyn iddynt allu paratoi. Yn y cyfamser, mae Cymru'n parhau i gynllunio ar gyfer tri Safle Rheolaethau'r Ffin ar gyfer gwiriadau iechydol a ffytoiechydol: Safle wedi'i redeg gan y llywodraeth yng Nghaerdybi; a dau gyfleuster wedi'u rhedeg gan y porthladd yn Abergwaun a Doc Penfro.

Mae Llywodraeth y DU wedi cyhoeddi "Safeguarding the Union" (31 Ionawr 2024), sy'n nodi rheolau ar gyfer nwyddau sy'n symud rhwng Prydain Fawr a Gogledd Iwerddon. Mae nodweddion i'w croesawu, gan gynnwys tynhau'r diffiniad o Nwyddau Cymwys Gogledd Iwerddon. Mae hyn yn ailddatgan ymrwymiad ym Model Gweithredu Targed y Ffin a oedd yn rhan allweddol o'n cytundeb, gan gynyddu bioddiogelwch ac atal masnach rhag cael ei dargyfeirio oddi wrth borthladdoedd yng Nghymru. Cyflwynwyd Offeryn Statudol y DU i roi'r newid hwn ar waith i Senedd y DU ar 1 Chwefror 2024. Mae darpariaethau mewn Offeryn Statudol arall yn sicrhau bod Nwyddau Cymwys Gogledd Iwerddon sy'n teithio drwy Iwerddon (er enghraifft ar y fferi o Ddilyn i Gaerdybi) yn cadw mynediad dirwystyr at farchnad Prydain Fawr, sydd eto'n diogelu ein llwybrau masnach.

Fodd bynnag, mae *Safeguarding our Union* hefyd yn cynnwys datganiad na fydd Safle Rheolaethau'r Ffin yn Cairnryan, er ei fod yn cadarnhau bod rheolau Model Gweithredu Targed y Ffin yn berthnasol i nwyddau o Iwerddon (ar wahân i Nwyddau Cymwys Gogledd Iwerddon) sy'n cael eu mewnfurio i Brydain Fawr ar y llwybr hwnnw. Rydyn ni'n pwysu ar Lywodraeth y DU i gael rhagor o wybodaeth am ei chynnig i gynyddu bioddiogelwch ac atal masnach rhag cael ei dargyfeirio oddi wrth borthladdoedd yng Nghymru.

Mae'n hollbwysig bod gennym reolau clir ar gyfer nwyddau sy'n dod o Iwerddon i Brydain Fawr a bod awdurdodau ar y rheng flaen yn gallu gwahaniaethu rhwng Nwyddau Cymwys Gogledd Iwerddon a nwyddau eraill sy'n rhwym wrth drefn Model Gweithredu Targed y Ffin, ac nad yw'r rheolau'n cael eu camddefnyddio.

Mewn cyflwr sefydlog, mewnforywr fydd yn talu costau gwiriadau ffin ac mae Llywodraeth y DU wedi cytuno i dalu costau adeiladu Safleoedd Rheolaethau'r Ffin yng Nghymru, yn amodol ar gymeradwyo achosion busnes. Fodd bynnag, nid yw wedi ymrwymo i ariannu costau ehangach, er enghraifft recriwtio a hyfforddi staff i gynnal y gwiriadau. Mae hon yn gost sy'n gysylltiedig â Brexit, a dylai Llywodraeth y DU ei hariannu. Heb yr ymrwymiad hwnnw, mae Llywodraeth Cymru wedi darparu cyllid cychwynnol er mwyn i Sir Benfro ac Ynys Môn allu dechrau paratoi. Fodd bynnag, bydd yn rhaid iddynt recriwtio staff ychwanegol cyn dechrau cynnal gwiriadau ffisegol, felly bydd angen dod o hyd i gyllid cyn cytuno ar ddyddiad dechrau.

Masnach rhwng y DU a'r UE

Mae'r Cytundeb Masnach a Chydweithredu yn hollbwysig i economi Cymru. Dyma'r sail ar gyfer masnach mewn nwyddau rhwng Cymru (a gweddill y DU) a'r UE. Mae hefyd yn cynnwys ymrwymiad i sicrhau tegwch yn y farchnad ar gyfer cystadleuaeth agored a theg drwy atal camystymiadau masnach neu fuddsoddiadau, sy'n cyfyngu'n anuniongyrchol ar y posibilrwydd o wahaniaethau mewn materion fel rheoliadau'r amgylchedd a chyflogaeth, a chymorth gwladwriaethol/cymorthdaliadau cyhoeddus.

Mae'r Cytundeb Masnach a Chydweithredu yn darparu strwythur cymhleth o bwllgorau rhwng y DU a'r UE i oruchwylio ei weithrediaeth, yn benodol mewn cysylltiad â masnach a thegwch yn y farchnad. Mae'r pwyllgorau hyn yn edrych ar amrywiaeth o faterion ac yn darparu ar gyfer penderfyniadau ar y cyd i ddelio â materion brys neu rai sy'n datblygu. Er enghraifft, ym mis Rhagfyr 2023, gwnaeth y DU a'r UE benderfyniad ar y cyd ei bod er budd y naill a'r llall i ymestyn rheolau masnachu â therfyn amser ar gyfer cerbydau trydan i leihau'r costau i weithgynhyrchwyr a defnyddwyr, ac i roi hwb i werthiannau cerbydau trydan.

Mae'r Cytundeb Masnach a Chydweithredu wedi cael ei ddatblygu'n barhaus ers cytuno arno mewn amgylchiadau anodd ychydig dros dair blynedd yn ôl. I ddechrau, prin oedd ymrwymiad Llywodraeth y DU i gynnwys y llywodraethau datganoledig yn weithredol i sicrhau bod y system yn gweithio yn unol â'r setliad datganoli. Mae'n ymddangos bod pethau'n fwy cadarnhaol erbyn hyn, ond hoffem weld gwelliannau o hyd.

Rydyn ni wedi galw am gynnwys y llywodraethau datganoledig yn llawn wrth baratoi safbwyntiau'r DU ar gyfer cyfarfodydd â'r UE ar faterion datganoledig, neu ar faterion

heb eu datganoli sy'n cael effaith arwyddocaol ar gyfrifoldebau datganoledig. Dylai wedyn arwain at ddarparu ar gyfer cyfranogiad y llywodraethau datganoledig fel rhan o ddirprwyaeth y DU yn y cyfarfodydd ffurfiol hynny. Mae hyn yn cyfateb i'r hyn a oedd yn digwydd pan oedd y DU yn negodi yn yr UE fel aelod-wladwriaeth. Ni ddylai greu unrhyw broblemau ymarferol na chyfansoddiadol nawr bod y DU yn drydedd wlad.

Hefyd, rhaid i'r Llywodraeth y DU fod yn fwy agored yn ei dull o weithredu'r Cytundeb Masnach a Chydweithredu a dylai geisio safbwyntiau rhanddeiliaid yn hyn o beth. Mae strwythurau pwysig yn y Cytundeb y dylem adeiladu arnynt, fel Grŵp Cynghori Domestig y DU sy'n bwydo i Fforwm Cymdeithas Sifil y DU a'r UE. Mae'r rhain yn cael dylanwad mwy a mwy arwyddocaol ar ddull gweithredu'r DU a'r UE. Rwy'n falch bod mewnbwn Cymreig effeithiol i Grŵp Cynghori Domestig y DU a hoffwn ei weld yn cael ei gryfhau.

Mae hefyd rôl gynyddol i'r Cynulliad Partneriaeth Seneddol a sefydlwyd o dan y Cytundeb Masnach a Chydweithredu, gan ddod â Seneddwyr o'r DU a'r UE ynghyd. Rwy'n ddiolchgar i Senedd Cymru am anfon Aelodau i arsylwi ar hyn ac yn gobeithio y gall eu dylanwad ynddo gynyddu.

Mae'r Grŵp Rhyngweinidogol ar Gysylltiadau rhwng y DU a'r UE, sy'n cael ei gadeirio gan Weinidog Ewrop o'r Swyddfa Dramor, y Gymanwlad a Datblygu, yn cyfarfod cyn cyfarfodydd Cyngor Partneriaeth y DU-UE mewn cysylltiad â'r Cytundeb Masnach a Chydweithredu ar lefel Weinidogol. Mae'n goruchwyllo mewnbwn llywodraethau datganoledig i weithrediad y Cytundeb. Rwy'n mynychu fel cynrychiolydd Llywodraeth Cymru.

Porthladdoedd Rhydd

Ym mis Mai 2022, cytunodd Llywodraeth Cymru a Llywodraeth y DU i sefydlu rhaglen Porthladdoedd Rhydd yng Nghymru. Ym mis Mawrth 2023, cytunodd Llywodraeth Cymru a Llywodraeth y DU ar y cyd i wahodd dau ddarpar borthladd rhydd yng Nghymru i ddatblygu achos busnes: Porthladd Rhydd Ynys Môn; a'r Porthladd Rhydd Celtaidd yn Aberdaugleddau a Phort Talbot.

Yn Natganiad yr Hydref yn 2023, cyhoeddodd Llywodraeth y DU estyniad i Borthladdoedd Rhydd Lloegr o bum mlynedd i ddeg, a dilynodd hynny gan gyhoeddi Map Cyflawni Porthladdoedd Rhydd. Mae'r Map yn cynnwys Cronfa Cyfleoedd Buddsoddi gwerth £150 miliwn i helpu i ddenu buddsoddiad mewn Porthladdoedd Rhydd a Pharthau Buddsoddi. Rydyn ni'n gweithio gyda Llywodraeth y DU i sicrhau y bydd Porthladdoedd Rhydd Cymru'n elwa ar y cyhoeddiadau hyn.

Mae gan Borthladdoedd Rhydd Cymru uchelgais i greu 29,000 o swyddi a denu £6.9 biliwn o fewnfuddsoddiad. Bydd y Porthladdoedd Rhydd a busnesau yn cael cymorth drwy amrywiaeth o gymelliadau treth, gan gynnwys rhyddhad y Dreth Trafodiadau Tir ac ardrethi annomestig. Byddant hefyd yn cael cymorth drwy gadw ardrethi annomestig am 25 mlynedd i fuddsoddi mewn adfywio a seilwaith, cyllid cyfalaf sbarduno (hyd at £25m), a chyllid refeniw (£1m) ar gyfer pob Porthladd Rhydd.

Ym mis Rhagfyr 2023, cyflwynodd consortia Porthladd Rhydd Ynys Môn a'r Porthladd Rhydd Celtaidd eu Hachosion Busnes Amlinellol. Mae swyddogion ar draws

Llywodraeth Cymru, ochr yn ochr â swyddogion o Lywodraeth y DU, wrthi'n asesu'r Achosion hyn yn fanwl.

Parthau Buddsoddi

Amlinellais gefnogaeth Llywodraeth Cymru ar gyfer dau Barth Buddsoddi yng Nghymru ar 7 Tachwedd 2023. Cytunodd y Canghellor ar hyn a'i gyhoeddi yn Natganiad yr Hydref yn 2023. Bydd un yn y Gogledd-ddwyrain (Sir y Fflint a Wrecsam) ac un yn y De-ddwyrain (ardaloedd teithio i'r gwaith Caerdydd a Chasnewydd).

Mae trafodaethau ar y cyd bellach yn mynd rhagddynt rhwng swyddogion yn y Cyd-bwyllgorau Corfforedig, Llywodraeth y DU a Llywodraeth Cymru i nodi blaenoriaethau buddsoddi ym mhob Parth Buddsoddi, ac i ddechrau'r broses o ddatblygu achosion busnes. Mae Canllawiau Technegol i helpu'r Cyd-bwyllgorau Corfforedig i ddatblygu achosion busnes wrthi'n cael eu trafod gan Lywodraeth Cymru a Llywodraeth y DU. Ar ôl cytuno ar y canllawiau a'u cyhoeddi ar y cyd, bydd y Cyd-bwyllgorau yn gallu cyflwyno achosion busnes yn ffurfiol.

Sgiliau a Phrentisiaethau

Y llynedd, cyhoeddais Gynllun Sgiliau Sero Net Cymru. Ym mis Hydref, cyhoeddais ymgynghoriad sgiliau sector sero net a fydd yn dylanwadu ar y gwaith o ddatblygu ein mapiau sgiliau. Wrth lunio'r cynllun, buom yn gweithio ar draws y llywodraeth, gyda rhanddeiliaid allanol a phartneriaid allweddol i gael darlun o'r dirwedd sgiliau sero net yn erbyn yr wyth sector allyriadau sydd wedi'u hamlinellu yn Sero Net Cymru.

Yn y gwanwyn, bydd Llywodraeth Cymru'n cyhoeddi mapiau sgiliau sector a fydd yn cynnwys y prif gerrig milltir, y buddsoddiad yng Nghymru a'r gofynion sgiliau ar gyfer pob sector allyriadau. Mae gennym rôl hollbwysig i'w chwarae yn sicrhau bod sgiliau'n elfen allweddol sy'n ein galluogi i sicrhau Cymru sero net, hybu gwaith teg ynghyd â chyflogaeth dda a diogel, a gwneud yn siŵr bod y fframwaith priodol yn ei le yn gynnar. Bydd y mapiau hyn yn dylanwadu ar ein polisi ac yn ein helpu i gynllunio i sicrhau ein bod yn ysgogi'r broses o greu ein gweithlu yn y dyfodol.

Mae hyd a lled yr heriau cyllidebol sy'n wynebu Llywodraeth Cymru ar hyn o bryd yn deillio o benderfyniad Llywodraeth y DU i ddwyn pwerau ac arian oddi ar Gymru. Nid yw Llywodraeth y DU wedi disodli cyllid yr UE yn llawn, gan arwain at ddiffyg o bron i £1.3 biliwn mewn termau real i Gymru yn ystod y cyfnod rhwng mis Ionawr 2021 a mis Mawrth 2025. Roedd nifer sylweddol yn elwa ar Gronfa Gymdeithasol Ewrop yng Nghymru, yn benodol rhaglenni cenedlaethol fel Prentisiaethau, Rhaglenni Cyflogadwyedd Cymunedol, ReAct+ a Twf Swyddi Cymru+. Roedd y rhaglenni hyn a'u rhagflaenwyr yn dibynnu'n drwm ar gyllid Ewropeaidd (er enghraifft, roedd rhaglenni cyflogadwyedd yn cael tua £30m y flwyddyn). Yn siomedig, mae Llywodraeth y DU wedi gwrthod unrhyw rôl gwneud penderfyniadau neu fynediad at gyllid yn lle cyllid yr UE drwy'r Gronfa Ffyniant Gyffredin y DU i Lywodraeth Cymru. O ganlyniad, ni all y rhaglenni hyn barhau i weithredu ar yr un raddfa ag o'r blaen.

Yn y cyfamser, rwyf wedi dyrannu cyllid i weithgareddau hollbwysig sy'n sicrhau bod y system sgiliau yng Nghymru yn parhau i weithredu'n effeithiol, gan ganolbwyntio ar ein buddsoddiad a'n hymdrechion parhaus mewn meysydd allweddol fel

Prentisiaethau a Twf Swyddi Cymru+. Ers mis Mai 2021, rydyn ni wedi cyflawni dros 43,000 o brentisiaethau bob oed newydd. Rhwng mis Ionawr 2015 a diwedd mis Rhagfyr 2023, disgwylir bod y rhaglen brentisiaethau wedi tynnu £206m o gyllid Cronfa Gymdeithasol Ewrop i lawr, gan gefnogi tua 5,000 o brentisiaethau yng Nghymru. Dyma faint y twll yn sgil tynnu cyllid yr UE.

Yn wahanol i Loegr, rydyn ni wedi dewis diogelu ansawdd ein prentisiaethau. Mae buddsoddi mewn prentisiaethau o ansawdd uchel yn helpu dysgwyr i adeiladu gyrfaoedd cryfach. Mae'n eu helpu i ennill mwy dros y tymor hirach mewn gwaith sy'n cynnig cyfleoedd i gamu ymlaen. Mae buddsoddi mewn prentisiaethau yn dal yn flaenoriaeth gwario allweddol ac er gwaethaf y cefndir ariannol, rydyn ni'n dal yn buddsoddi'n sylweddol mewn prentisiaethau. Mae'r gostyngiad yn llai o lawer na'r gostyngiad mewn llinellau eraill yn y gyllideb. Byddwn yn buddsoddi £138m flwyddyn nesaf mewn prentisiaethau o ansawdd uchel a fydd yn arwain at fanteision hirdymor a gyrfaoedd cryfach.

Gan weithio mewn partneriaeth â'r rhwydwaith prentisiaethau, byddwn yn parhau i hybu a blaenoriaethu prentisiaethau o ansawdd uchel, gan gynnwys y rhai mewn sectorau lefel uwch, mwy technegol – gan symud Cymru tuag at brentisiaethau ym meysydd STEM a pharatoi at sero net. Bydd y rhaglen brentisiaethau hefyd yn parhau i chwarae rôl yn y Warant i Bobl Ifanc. Rydyn ni'n disgwyl sicrhau hyn drwy gynyddu cyfran y bobl 16-24 oed sy'n dechrau prentisiaeth (hy o fewn cyfanswm y prentisiaethau newydd y gellir eu cyflawni gyda'r gyllideb sydd ar gael).

Er na allwn sicrhau y bydd prentisiaethau ar gael i bobl ifanc, byddwn yn anelu at ddylanwadu ar gyflogwyr er mwyn cynnig rhagor o gyfleoedd i bobl ifanc. Byddwn yn gweithio gyda'n rhwydwaith darparwyr i nodi opsiynau posibl ar gyfer annog cyflogwyr (gan gynnwys cysylltu â chyflogwyr newydd) i gynyddu nifer y prentisiaethau gwag sydd ar gael i bobl ifanc. Byddwn hefyd yn cynnal cyllid i'r cynllun prentisiaethau ar y cyd sy'n darparu cyfleoedd newydd i bobl ifanc nad ydynt yn gallu dod o hyd i swydd barhaol ddysgu sgiliau newydd yn y gweithle ac ennill cymwysterau a fydd yn eu galluogi i gael a chadw swyddi parhaol, hirdymor.

Bydd y rhaglen Cyfrif Dysgu Personol yn parhau i ddarparu cyfleoedd uwchsgilio ac ailsgilio i bobl mewn gwaith. Gan eu helpu i ennill cymwysterau lefel uwch drwy ddysgu hyblyg a phersonol, bydd y rhaglen hon yn galluogi'r unigolion hyn i ddatblygu sgiliau addasadwy ac i gamu ymlaen yn eu gyrfaoedd mewn sectorau â blaenoriaeth. Er y bydd hyn yn helpu i gynyddu cadernid ein gweithlu, mae angen inni ystyried sut mae mynd i'r afael â'r tanfuddsoddiad gan gyflogwyr yn sgiliau eu gweithlu. Mae ein rhaglen Sgiliau Hyblyg yn rhoi cymorth i fusnesau i'w helpu i uwchsgilio ac ailsgilio eu gweithlu.

Byddwn yn gweithio gyda'r Comisiwn Addysg Drydyddol ac Ymchwil a chyflogwyr i ddatblygu dull cydfuddsoddi. Nod y dull hwn fydd darparu sail gadarn dros newid y pwyslais o ddull wedi'i arwain gan y llywodraeth o ran buddsoddi mewn sgiliau i system wedi'i chyd-sefydlu gyda chyflogwyr a'i harwain ganddynt. Dim ond drwy gydweithio gallwn fynd i'r afael â'r bylchau mewn sgiliau ledled Cymru.

Dur

Mae'r sector yn parhau i weithredu mewn amgylchedd heriol. Mae wedi nodi nifer o flaenoriaethau allweddol, gan gynnwys datgarboneiddio, masnach ryngwladol, costau trethiant carbon ac ynni, a chaffael cyhoeddus o ddur. Mae argaeledd dur sgrap o ansawdd uchel yn flaenoriaeth arall sy'n dod i'r amlwg.

Mae sicrhau newid cyfiawn i ddyfodol carbon isel yn hanfodol ac oherwydd y cymysgedd o gyfrifoldebau yn ymwneud â busnes a diwydiant sydd wedi'u cadw a'u datganoli, mae angen inni weithio'n agos gyda Llywodraeth y DU i ddarparu'r cymysgedd cywir o bolisiau.

Tata Steel UK

Mae disgwyl i Tata Steel fuddsoddi £1.25 biliwn mewn cynhyrchu dur ym Mhort Talbot, sy'n cynnwys cyllid hyd at £500 miliwn gan Lywodraeth y DU. Ar 19 Ionawr, cyhoeddodd Tata Steel ei fod yn bwriadu cau ffwrneisi chwyth ym Mhort Talbot erbyn diwedd y flwyddyn galendr hon, gan effeithio ar hyd at 2,800 o swyddi. Byddai effaith ar tua 2,500 o'r swyddi hyn dros y 18 mis nesaf. Mae Tata Steel yn disgwyl effaith bosibl ar y 300 arall o swyddi mewn dwy i dair blynedd yn Llan-wern. Mae'r cymunedau sy'n gartref i'r gweithfeydd dur hyn wedi'u lleoli yn rhai o'r rhannau tlotaf o'r DU. Mae'r bwriad i gau'r ffwrneisi chwyth erbyn diwedd y flwyddyn yn peri pryder go iawn. Byddai'n well gennym weld proses bontio hirach ac arafach i gynhyrchu dur gwyrdd ym Mhort Talbot. Rydw i wedi gwneud dau ddatganiad ar y mater hynod bwysig hwn yn ddiweddar.

Mae ymgynghori ffurfiol wrthi'n mynd rhagddo rhwng Tata Steel a'r undebau. Rydym wedi cynnal cyfarfodydd rheolaidd gyda Tata Steel ac undebau ar draws safleoedd TSUK yng Nghymru. Byddwn yn parhau i drafod â'r busnes, undebau llafur a Gweinidogion y DU i gefnogi'r fargen orau i'r diwydiant dur.

Mae Llywodraeth y DU wedi sefydlu Bwrdd Pontio ac wedi darparu £100m o gyllid (£80m gan y Llywodraeth a hyd at £20m gan TSUK) ar gyfer cymorth tymor byr ac adfywio economaidd tymor hir. Mae'r Bwrdd wedi cyfarfod dair gwaith hyd yma. Mae gan Lywodraeth Cymru sbardunau a gwybodaeth sy'n hollbwysig i sicrhau canlyniadau cadarnhaol y gwaith hwn. Rydyn ni'n gweithio mewn partneriaeth â'r Bwrdd mewn ffordd ddiffuant a thryloyw i gefnogi meysydd o flaenoriaeth ar y cyd, ac i geisio cyflawni'r canlyniadau gorau i bawb.

Byddwn yn gweithio'n agos gyda phartneriaid allweddol fel y Ganolfan Byd Gwaith, Cymru'n Gweithio, awdurdodau lleol, byrddau iechyd, undebau llafur a sefydliadau trydydd sector i sicrhau bod cymunedau, busnesau a phobl a fydd yn colli eu swydd yn cael gwybodaeth, cyngor ac arweiniad ynghylch y cymorth sydd ar gael.

Ynghyd â'r adnoddau sydd ar gael gan Tata Steel ei hun a gan ein sefydliadau partner, gall rhaglenni cyflogadwyedd Llywodraeth Cymru, ReAct+ a Cymunedau am Waith+, ddarparu cymorth drwy hyfforddiant a mentora i'r rhai sy'n dymuno aros yn y farchnad lafur. Bydd Busnes Cymru yn darparu gwybodaeth, arweiniad a chymorth i fusnesau'r gadwyn gyflenwi yr effeithir arnynt. Mae Banc Datblygu Cymru'n rhan allweddol o strategaeth Llywodraeth Cymru i gefnogi economi Cymru ac i roi mecanwaith cymorth gwerthfawr i fusnesau Cymru, yn enwedig mewn cyfnodau hollbwysig o ansicrwydd economaidd.